

**D**ī conjugālēs ! Tūque, geniālis torī  
Lūcīna custōs ! Quæque, domitūram freta,  
Tīphyn novam frēnāre docuistī ratem !

4 Et tū, profundī sæve dominātor maris !  
Clārumque Tītān dīvidēns orbī diem !  
Tacitīsque præbēns cōnscium sacrīs jubar  
Hecatē trifōrmis !

Quōsque jūrāvit mihi  
8 deōs Iāsōn ! quōsque Mēdēæ magis  
fās est precārī : noctis æternæ Chaos !  
Āversa superīs rēgna, mānēsque impiōs,  
dominumque rēgnī trīstis, et dominam fidē  
12 meliōre raptam, vōce nōn faustā precor !

**N**unc, nunc adeste sceleris ultrīcēs deæ,  
crīnem solūtīs squālīdæ serpentibus,  
ātram cruentīs manibus amplexæ facem !  
16 Adeste, thalamīs horridæ quondam meīs  
quālēs stetistis ! Conjugī lētum novæ,  
lētumque socerō, et rēgiæ stirpī date !

Num pējus aliquid quod precer spōnsō malum ?  
20 Vīvat ! Per urbēs erret ignōtās egēns,  
exul, pavēns, invīsus, incertī Laris !  
Mē conjugem optet ! Līmen aliēnum expetat  
jam nōtus hospes ! Quōque nōn aliud queam  
24 pējus precārī, līberōs similēs patrī  
similēsque mātī ! Parta jam, parta ultiō est :  
peperi...

Querēlās verbaque in cassum serō ?

28 Nōn ībō in hostēs ? Manibus excutiam facēs  
cælōque lūcem !... Spectat hoc nostrī sator  
Sōl generis, et spectātur ? Et, currū īnsidēns,  
per solita pūrī spatia dēcurrit poli ?  
Nōn redit in ortūs et remētītur diem ?

32 Dā, dā per aurās curribus patriīs vehī !  
Committe habēnās, genitor, et flāgrantibus  
ignifera lōrīs tribue moderārī juga !  
Geminō Corinthos lītorī oppōnēns morās  
36 cremāta, flammīs maria committat duo !

**H**oc restat ūnum : prōnubam thalamō feram  
ut ipsa pīnum ; postque sacrificās precēs,  
cædam dicātīs victimās altāribus !  
40 Per vīscera ipsa, quære suppliciō viam,  
sī vīvis, anime ! sī quid antīquī tibi  
remanet vigōris. Pelle fēmineōs metūs,  
et inhospitālem Caucasum mente indue !

44 Quodcumque vīdit Phāsis aut Pontus nefās,  
vidēbit Isthmos ! Effera, ignōta, horrida,  
tremenda, cælō pariter ac terrīs mala  
mēns intus agitat... vulnera et cædem et vagum  
48 fūnus per artūs ? Levia memorāvī nimis :  
hæc virgō fēcī. Gravior exurgat dolor !  
Mājōra jam mē scelera post partūs decent.

52 Accingere irā, tēque in exitium parā  
furōre tōtō ! Paria narrentur tua  
repudia thalamīs ! Quō virum linguēs modō ?  
Hōc quō secūta es. Rumpe jam sēgnēs morās :  
quæ scelere parta est, scelere linquenda est domus.